

畿輔安瀾志

灤河卷上

原委

灤河卷下

附載

隄防

橋渡

祠廟

水利

畿輔安瀾志

臣王履泰恭纂

灤河卷上

原委

灤河古濡水一名上都河又名商都水訛爲山丹河發源塞外興和故城北獨石口之黑龍山元上都開平府地東北鑲黃旗牧廠界內之古道嶺西北流至冒海河朔之三道河

前漢書地理志遼西郡肥如元水東入濡水濡水南

入海陽師古曰濡音乃官反

〔魏書地形志〕肥如令

支城黃山濡河

〔水經〕濡水從塞外來東南過遼西

令支縣北酈注濡水出禦夷鎮東南其水二源雙引

夾山西北流出山合成一川又西北逕禦夷故城東

鎮北百四十里北流則連泉水注之謂之連泉浦右

則漢水入焉

謹案方輿記要魏收志又云太平眞君七年令支并入陽樂水經注濡水東南

經令支故城舊志云城蓋在遷安縣東也

〔元史地理志〕世祖命劉秉忠

相宅於桓州東灤水北之龍岡中統元年爲開平府

五年以闕庭所在加號上都

〔又〕興和路唐屬新州

金置柔鎮後并爲縣又升撫州 方輿紀要灤河在

開平衛南夷人謂之商都元人亦謂之御河大都七

年濬上都灤河 一統志興和故城在太僕寺左翼

牧廠西南二十里南至張家口百里今在多倫諾爾

鑲黃鑲白正白正藍四旗地界卽元上都故地 李

實奉使錄灤水闊不盈丈而中甚深土人以河水青

綠急流呼曰商都兩岸柳條叢生秋時採爲箭桿

口北三廳志黑龍山獨石口東北一百里案黑龍山

西南卽上都河源所自出折而北流古名濡水今之

欒河也其河土人呼爲上都河以元時上都在水北岸故名又轉音而爲商都今直訛爲山丹河矣

謹案欒河之名宋以前無之據漢志濡水師古以濡音乃官反則濡固讀如欒音水經注濡水篇謂連泉水東北入難河汗水西北入難河濡難聲相近俗語譌耳則濡本誤爲難難又音近於欒後乃直稱欒河耳宋史地理志平州隋置後唐爲契丹所陷改遼興府以營欒二州隸之王曾北使錄自偏搶嶺四十里過烏欒河東有欒川遼史地理志澤州欒河縣本漢

無終縣地金史地理志大定府神山縣遼澤州章宗
承安二年嘗置惠州陞孩兒館爲灤陽縣以隸之泰
和四年罷州及灤陽縣又右北平元爲平灤路明洪
武九年改置平灤府此皆因灤水而得名也口北三
廳志灤河至永平府界始名灤河王曾北使錄云出
偏搶關有灤河然則契丹以名州元明以名路府皆
從入塞至右北平之後乃有灤河之稱也

在今獨石口東北鑲黃旗牧廠界內之古道嶺蒙古名
巴延屯多固爾山左圪名哈達圖大巴汗山右圪名什

伯勒圖大巴汗兩水並出涓涓細流

〔謹案〕水經注濡水出禦夷東南其水二流雙引夾山西北流豈卽是歟又云左道則連泉水注之右則汗水入焉又豈卽左地右地之水歟

至平地塔子諾爾蒙古名德爾奔諾爾南衍復西北流十五里會諾克爾活洛又北五里至巴拉哈爾巴齊阿林五里至固石蒙古名哈達河朔會噶爾都絲泰又自西迄東迄北滌洞平衍間斷伏流十五里至冒達巴十里至四柵欄十八里至馬尼圖二里至冒海河朔之三

道河其源出牛圈子壩蒙古名楚庫勒蘇達巴汗伊黑
大壩蒙古名伊肯達巴汗千松壩蒙古名莫和爾達巴
汗三源相距各十餘里分支而出西流十五里匯爲一
河

謹案水經注濡水又東北流逕孤山南東北流呂泉
水注之水出呂泉塢西東南流屈而東逕塢南東北
流三泉水注之其源三泉鴈次合爲一水其卽此三
河歟

又西北三十里至冒海河朔會入于灤灤河得此水來

會而其勢始暢據禹貢夾右碣石入於河註云其水如遼濡滹易皆中高不與河通故必自北海然後能達河也

謹案漢志以濡水屬遼西肥如水經注謂出禦夷鎮資治通鑑註魏世祖破蠕蠕置降人于漠北東至濡原暨五原陰山分六鎮禦夷其一也又水經注以赤城之舊虜城爲禦夷鎮則今自開平至赤城皆其地矣獨石口之古道嶺以開平赤城計之正在東南與今形勢脗合其所云出山合成一川者殆卽指冒海

河朔而言歟又元史河渠志云河出金蓮川中

金史地理

志桓州有曷里澹川更名金蓮川世宗曰蓮者連也取金枝玉葉相連之義

宣鎮志

在雲州西北世宗

納涼地產黃花狀若芙蓉

明史地理志雲州堡北有灤河東有金連川

今由冒海河朔

至上都店沿河夾岸開有黃花與五代胡嶠北行紀所載旱金蓮形色正相類川名金蓮宜卽以此惟宋

歐陽修云灤水出炭山東北胡三省資治通鑑註遵

之後如職方圖方輿紀要及明統志皆祖其說今考

遼地理歸化州有炭山又謂之陁頭有涼殿山東北三十里有新涼殿而不言灤水所自出且其地距獨

石口數百里中間攢峯疊嶂勢難通流蓋傳聞之誤

也

口北三廳志炭山在興和故城東北遼時清暑之地今獨石口外東一百里所謂黑龍山乃舊炭山

也明統志云炭山在萬全縣右衛城南其說似近然其山庫薄淺狹殊不稱世主巡遊之地且歷代相承均在版圖之內不應淹沒不傳乃爾遼本紀太祖三年置羊城於炭山北以通市易而金史地理志柔遠縣有北羊城食貨志國初於北羊城燕子城之間置權場易北方畜牧謹案燕子城疑卽興和城也而羊城與之相近疑卽後所稱沙城者是則炭山在興和之北矣據廳志所辨正則黑龍山卽炭山特非卽歸化之炭山耳考黑龍山卽上都之龍岡明統志上都城有東涼西涼二亭元主幸上都駐蹕處意卽遼之清暑遺跡歟

自冒海河朔仍西北流四里會布爾哈蘇泰

謹案口北三廳志波羅釵察河源出壩外正黃旗查
哈爾饅頭壩西北山內西流匯布爾哈蘇泰河源出
察哈爾正黃旗境內青楊溝壩北流合波羅金察河
三里至烏克爾赤諾十里至克爾哈達十里至克楚哈
喇十九里至西涼亭蒙古名察罕格爾

周伯琦詩注上京東五十里有東涼亭西百五十里
有西涼亭其地皆饒水草有禽魚山獸至離宮巡狩
至此歲必校獵焉 口北三廳志西涼亭上都河店
南十餘里俗呼爲蕭灘樓蒙古又謂之察汗格爾

二里至薩達克圖阿林二十一里至紅城蒙古烏藍河屯七里至上都店入多倫諾爾界

〔元史兵志〕仁宗延祐七年以紅城中都威衛屬徽政院不便命遵舊制俾樞密領之又於紅城周圍立屯仍屬中都威衛 〔二統志〕沙城又名紅城在鑲黃旗牧廠西三十里舊興和城北十里 〔口北三廳志〕上都河發源東北大山中其水西北流逕紅城又北逕開平故城又明安城今人呼爲紅城子蒙古名諾海霍朔亦曰五藍城五藍華言紅也在獨石口北一百

里又七里潭一名多倫泊土人呼爲多倫諾爾多倫
華言七諾爾華言河泊也其水清冽中產魚蛤之類
天旱禱雨輒應 一統志多倫諾爾在上都牧廠東
北明安廢驛太僕寺牧廠南稍西土人呼爲五藍城
明初爲開平西南第三驛城

又一里逕拉馬說隆三里逕塔奔拖羅海

謹案一統志有他賁拖落海山在上都牧廠西南獨
石口西北一百十五里當卽塔奔拖羅海也

十里至紅山嘴蒙古名諾海河朔轉東北流一里逕巴

彥昆堆六十九里逕七鷹山蒙古名多倫峩博圖

〔一統志〕七鷹山鑲黃旗牧廠東七十里蒙古名額倫拖羅海山額倫猶言鷹也又牧廠北一百四十里有額倫山蓋亦七鷹之一

三十里逕青城蒙古名波羅河屯

〔口北三廳志〕一統志威鹵廢驛今牧廠地土人呼爲博羅峩在獨石口東北一百四十里明初置驛於此爲開平西南第二驛案蒙古呼波羅河屯猶華言青城也在明安城東北六十里

二十里逕馬尼爾圖阿林十五里逕鄂拖海二十里逕
烏蘭哈勒哈

〔統志〕紅羅山在上都牧廠西直獨石口北一百五
十五里蒙古名五蘭哈爾哈山

六里逕圖爾楚克八里逕烏里雅蘇泰三十里逕伊肯
門楚克五里逕哈達圖

〔統志〕哈達圖山鑲黃旗牧廠北九十里

五里逕巴汗門楚克三里逕野馬圖八里逕庫爾圖巴
噶遜十里逕恩楚海十里逕烏蘇圖十七里會喀喇烏

素

謹案口北三廳志石頂河源出伊克腦兒西北流注
昂古里泊土人呼喀喇烏蘇河是也又引一統志黑
水灤正白旗西北一百四十里蒙古名喀喇烏素又
鴛鴦灤張家口西北正黃旗牧廠東六十里土人呼
昂古立腦兒哈柳台河喀喇烏蘇數水注其中則石
頂河卽黑水灤而昂古里泊卽昂古立腦兒也

八里逕哈達圖峩博二十里逕什巴爾泰六里至上都
城西初而東流五里逕上都城南會察汗諾爾